



Cuira, ils 22 da zercladur 2024

Communicaziun a las medias

Fatschas giuvnas en suprastanza

Radunanza da delegadas e delegads da la Lia Rumantscha a Savognin

Sonda, ils 22 da zercladur 2024, ha già lieu a Savognin la radunanza da delegadas e delegads da la Lia Rumantscha sut la batgetta da las copresidentas Urezza Famos e Gianna Luzio. En il center da la radunanza èn stadas las elecziuns e reelecziuns statutaras per la perioda d'uffizi 2025-2027. La Lia Rumantscha ha ultra da quai infurmà davart il progress en dumondas da la transfurmaziun digitala. Suenter la radunanza hai dà in gentar cuminaivel cun «Buccadinas da Poetry Slam».

Sonda, ils 22 da zercladur 2024 èn 39 delegadas e delegads ed ina trentina da giasts stads preschents a la radunanza da la Lia Rumantscha a Savognin. L'organ suprem da la Lia Rumantscha ha approvà tut las fatschentas statutaricas unanimamain. Preschent è era stà Daniel Wasescha, president communal da la vischnanca da Surses. En sia allocuziun ha Wasescha relatà davart las sfidas ed ils gronds sforzs per mantegnair il rumantsch en vischnanca.

Fatschas giuvnas en suprastanza

La radunanza ha reelegì unanimamain las copresidentas Urezza Famos e Gianna Luzio ed il suprastant Patric Vincenz (Uniun Rumantscha Grischun Central). Da nov èn vegnids elegidas ed elegids en suprastanza Gianna Duschletta (Uniun dals Grischs), Lars Prevost (Uniun da las Rumantschas e dals Rumantschs en la Bassa) e Toni Vinzens (Surselva Romontscha). La suprastanza sa legra da pudair beneventar trais personas giuvnas che s'engaschan gia oz cun bler schlantsch en las uniuns affiliadas.

Las copresidentas han engrazià cordialmain a las personas che sortan la fin da l'onn da la suprastanza; Angela Jann (Uniun dals Grischs), Donat Nay (Surselva Romontscha) e Roman Pfister (Uniun da las Rumantschas e dals Rumantschs en la Bassa) ed a las ulteriuras titularas ed als ulteriurs titulars en ils differents uffizis.

[Ina survista da tut las elecziuns e reelecziuns sa chatta a la fin da questa communicaziun.]

Accents per l'onn 2025

Il secretari general Markus Solinger ha infurmà davart il preventiv e las activitads per l'onn 2025. Il preventiv 2025 quinta cun ina svieuta da radund CHF 4,4 miu. ed in pitschen deficit da var CHF 69'000.—. Ultra da las numerusas activitads cuntinuantas sin ils champs da la cuminanza, da la promoziun e da la represchentaziun dals interess preschenta la Lia Rumantscha il 2025 duas novas purschidas. L'onn da scola 2024/25 offra ella la scolaziun «rumantsch a distanza» per giuvenilas e giuvenils dal stgalim gimnasial l'emprima giada sin plaun naziunal. Enfin uss exista in tal program da scolaziun be per las scolas tudestgas dal stgalim superiur en il Grischun. In'ulteriura novaziun lantscha la



Lia Rumantscha l'onn proxim cun il lavuratori «Scriver litterar» che consista da tschintg moduls tematics, d'ina survista dal canon litterar rumantsch e d'ina part davart la pratica da scriver.

Dinamica en la transformaziun digitala

En la part da las orientaziuns han Markus Solinger, secretari general, ed Ignacio Pérez Prat, responsabel per la transformaziun digitala, orientà davart ils svilups actuals en la digitalisaziun dal rumantsch. La Lia Rumantscha elavura actualmain ina strategia per la transformaziun digitala dal rumantsch en contact cun partenaris instituziunals. Pérez Prat ha explitgà las iniziativas per stabilir rimmadas da datas digitalas ch'èn necessarias per trenar models linguistics, dals quals il rumantsch na dispona anc betg. Buns models linguistics èn indispensabels per realisar applicaziuns digitalas d'alta qualitat.

Buccadinas da Poetry Slam

Per engrazià a tut las persunas che s'engaschan di per di en favur dal rumantsch ha la Lia Rumantscha envidà sonda suentermezdi ad in gentar cuminaivel cun «Buccadinas da Poetry Slam». Gianna Duschletta ed Uolf Candrian han dà in insatg da texts slammads. Cun questa produziun moderada da Victoria Mosca ha la Lia Rumantscha fatg reverenza a las occurrenz «Poetry Slam Ladin» che l'Uniun dals Grischs realisescha cun grond success dapi l'onn passà.

La radunanza da delegadas e delegads 2025 da la Lia Rumantscha ha lieu ils 21 da zercladur 2025.

Kurzzusammenfassung Deutsch:

Delegiertenversammlung der Lia Rumantscha in Savognin

Am Samstag, 22. Juni 2024, fand die Delegiertenversammlung der Lia Rumantscha in Savognin statt. Die Co-Präsidentinnen Urezza Famos und Gianna Luzio wurden im Rahmen der Gesamterneuerungswahlen für die Jahre 2025-2027 einstimmig wiedergewählt. Mit Gianna Duschletta von der Uniun dals Grischs, Lars Prevost von der Uniun da las Rumantschas e dals Rumantschs en la Bassa und Toni Vinzens von der Surselva Romontscha ergänzen drei neue Gesichter der jüngeren Generation den Vorstand. Neben dem statutarischen Teil standen Informationen über die Fortschritte im Bereich Digitalisierung des Rätoromanischen im Zentrum des Interesses der Delegiertenversammlung.



Survista elecziuns e reelecziuns per ils onns 2025 fin 2027

num	represchentanza	elecziun/reelecziun 2024
copresidentas		
Urezza Famos	Lia Rumantscha	Urezza Famos
Gianna Luzio	Lia Rumantscha	Gianna Luzio
suprastanza		
Patric Vincenz	Uniun Rumantscha Grischun Central	Patric Vincenz
Angela Jann	Uniun dals Grischs	Gianna Duschletta
Donat Nay	Surselva Romontscha	Toni Vinzens
Roman Pfister	Uniun da las Rumantschas e dals Rumantschs en la Bassa	Lars Prevost
suppleanza da la suprastanza		
Gian Marco Beeli	Uniun Rumantscha Grischun Central	Gian Marco Beeli
Romedi Conradin	Uniun dals Grischs	Romedi Conradin
Toni Vinzens	Surselva Romontscha	Linus Livers
cumissiun da gestiun		
Flurina Cantieni		Flurina Cantieni
Curdin Mayer		Curdin Mayer
Fabian Augustin		Andriu Decurtins
Sandra Baltermia		Sandra Baltermia
Marcus Beer		Muriel Degonda
post da revisiun		
Lischana Fiduziari Andri Lansel		Lischana Fiduziari Andri Lansel